

Fugitivs provocheschan tensiuns internas

Pled d'avertura da la sessiun d'october

■ (anr/fa) En ses emprim pled d'avertura ha tematisà il president dal cussegl grond Michael Pfäffli ils fugitivs. El ha numnà las lingias ch'i dovria per metter urden en la convivenza cun els.

«Era sch'il tema fugitivs na stat betg propri sisum la glista dals temas politics actuals occupa el blera gliעד», ha ditg il president dal parlament grischun *Michael Pfäffli* (pld, Engiadina'Ota) tegnend ses pled d'avertura, «las novas da persunas che perdan lur vita en la Mar Mediterrana e da l'autra vart da cuntrabandists d'umans che fan buns affars sveglians emozziuns ed era tensiuns internas.» Ad el sez chaschuna il tema tensiuns per plirs motivs, dad ina vart sco politicher burgais e liberal, alura sco president dad ina plaiv e sco terza sco interprender. «Co vegnan ins a frida cun questas grondas tensiuns?», s'ha el dumandà e constatà ch'i saja da prender posiziun.

Dretg da dimora per proteger ils perseguitads

Fugitivs èn persunas che mitschan per via da perseguziuns. Quellas duain, tenor Pfäffli, avair il dretg da vegnir protegidas, d'avair uschia il dretg da survegnir asil. «Sch'ellas nun èn perseguitadas duain ellas però bandunar noss pajais», ha el punctuà, «mo in agir consequent en cas d'abus stgaffescha la confidenza necessaria, e mo uschia poi vegnir prevegna ad in odi incalculabel.» Ultra da las cleras regulaziuns davart l'arriv ed il segiurn dals fugitivs dovri a l'avis dal president dal parlament grischun lingias cleras che mettan urden en la convivenza.

«Resguardar leschas, ma er usits ed isanzas»

Ina da questas lingias è, sco che Pfäffli ha ditg, la lescha penala: «La finamira da quella è la protecziun dals bains giuridics, sco p. ex. la vita e la proprietad. Questa lescha protegida da quels ch'èn qua envers quels che arrivan e viceversa.» In'ulterura lingua èn ils rituals ed ils usits en la societad svizra, sco p. ex. dar il maun en scola. «Sche questa lingua vegn surpas-



Michael Pfäffli, il president dal cussegl grond.

FOTO Y. BÜRKL

sada vegn quai resguardà cun dretg sco cuntravenziun cunter las normas che reglan nossa convivenza», ha menziunà Pfäffli. Quai na vala per el però betg per las disas: «Mintg'uman ha sias disas, sco ch'el pensa, senta, tscherna sia vestgadira u cuvra ses chau e bler dapli. Intervenziuns statalas u schizunt sancziuns en il sector da las disas ston vegnir refusadas cleramain.»

«La finamira duai esser il return en lur pajais»

Il president dal cussegl grond ha punctuà ch'i saja da proteger ils fugitivs als dond la pussaivladad d'abitar per in temp en Svizra. La finamira duai tenor el però adina esser ch'els turnian en lur pajais cur che la situaziun permetta quai: «L'integrazion stuess perquai vegnir concepida uschia che ni il profit dal pajais ospitant ni la vita sedentara stattan en il center, mabain il manaschement optimal dal segiurn temporar.» Pfäffli è conscient che quai po dirar ditg fin che tscherts pajais èn puspè segirs avunda per il return dals fugitivs. El ha numnà l'exempel dal Tibet

ch'è vegnì annectà da la China l'onn 1960: «Sunter quasi 60 onns dura l'occupaziun dal Tibet anc adina, da maniera ch'ils fugitivs na pon anc adina betg turnar senza privel.»

Saramentaziun dals novs suppleants

Sunter il pled d'avertura èn vegnids saramentads tschintg suppleants ch'èn l'emprima giada en questa funcziun. I sa tracta da *Stefano Maurizio* (pbd) che remplazza il deputà *Michael Maurizio* (pld, Bergiaglia). Il segund suppleant ch'è vegnì saramentà è *Lukas Horrer* (ps), el remplazza *Luca Tenchio* (pcd, Cuir). *Philipp Ruckstuhl* (pcd) è vegnì saramentà sco suppleant da *Theo Joos* (pcd, Razén) ed *Andri Furrer* (pld) sco suppleant da *Peter Peyer* (ps, Trin). *Rossella a Marca* (indep.) è vegnida saramentada sco suppleanta da *Nicoletta Noi-Togni* (indep., Roveredo).